

Singulis tamen Conferentiis Episcoporum, postquam popularem interpretationem paraverint, et ab hac Sacra Congregatione confirmationem acceperint, facultas fit alium diem ante 29 martii 1970, pro opportunitate, statuendi, quo novus Ordo Baptismi parvulorum vigere incipiat.

Contrariis quibuslibet minime obstantibus.

E Civitate Vaticana, die 10 iulii 1969

A. BUGNINI, *a Secretis.*

BENNO Card. GUT, *Praefectus.*

INSTRUCTIO DE EDITIONIBUS APPARANDIS ET DE USU NOVI ORDINIS LECTIONUM MISSAE

La Nunziatura Apostolica in Italia, con lettera n.1530 del 9.VIII.1969 ha trasmessa la seguente "Instructio" della Sacra Congregazione per il Culto Divino che porta il n.838/69:

Decreto, quo novus Ordo Lectionum Missae promulgatur, statuitur ut a die 30 novembris 1969, dominica prima Adventus, hic vigere incipiat. Conferentiis Episcopalibus insuper committitur eiusdem Ordinis Lectionum editiones apparare cum textibus lingua vernacula exaratis.

Attentis autem difficultatibus, quas harum editionum praeparatio secum certo feret, Sacra haec Congregatio pro Cultu divino, approbante Summo Pontifice, opportunum ducit sequentes indicationes praebere, quibus labor Conferentiarum Episcopalium dirigatur et facilius reddatur.

1.- Dominica prima Adventus 1969 tamquam prima dies habenda est, qua novus Ordo Lectionum Missae *adhiberi poterit*. Hac enim die vigere incipiet etiam novus Ordo Missae: quod facultatem praebet habendi corpus organicum textuum liturgicorum et rituum pro celebratione eucharistica ditiore forma, sub aspectu pastoralis, ordinanda. Attamen novi Lectionarii usus per gradus introduci potest.

2.- Multiplex numerus lectionum exigit ut novum Lectionarium pluribus voluminibus distinctum edatur. Cura de materia in singulis voluminibus

disponenda relinquatur Conferentiis Episcopalibus, quae prae oculis habebunt faciliorem usum in celebratione liturgica.

3.- Cura imprimis impendatur edendis voluminibus Ordinis Lectionum pro dominicis et festis diebus. Immo expedit ut statim paretur volumen aut saltem eius pars continens seriem B lectionum dominicalium, quae erunt adhibendae proximo anno liturgico: quod sperandum est fore ut etiam brevi temporis intervallo, quod usque ad diem 30 novembris superest, effici possit. Tempore autem sequenti, et maiore cum tranquillitate, parari poterunt alia volumina.

4.- Ad Ordinem lectionum pro feriis quod attinet, cum fere ubique in usum iam habeantur schemata ad experimentum, res minus urget, et schemata quae nunc adhibentur ad tempus servari possunt, usque dum editio novi Lectionarii ferialis a Conferentia Episcopali apparanda in promptu sit.

5.- Hac eadem ratione, etiam partes Lectionarii quae ad Proprium et Commune Sanctorum et ad Missas votivas aut defunctorum spectant, ad tempus servari possunt quae in Missali Romano exstant. Expedit enim ut lectiones huiusmodi una cum Lectionario feriali edantur.

6.- In apparandis editionibus novi Ordinis lectionum, principia servantur statuta in Instructione *De popularibus interpretationibus conficiendis* data a "Consilio ad exsequendam Constitutionem de sacra Liturgia" die 25 ianuarii 1939. Textus populares si sumuntur e Sacrae Scripturae interpretationibus iam legitime approbatis et ab *Apostolica Sede ad usum liturgicum confirmatis*, nova confirmatione non indigent. Si vero sumuntur e Sacrae Scripturae interpretationibus ad usum liturgicum non approbatis vel ex novo conficiuntur, ad Sacram Congregationem pro Cultu divino transmittendi sunt pro confirmatione, *etiamsi agatur de interpretationibus ad interim paratis*. (Cf. declarationem circa interpretationes textuum liturgicorum "ad interim" paratas, editam in *Notitiae* 5, 1939, p. 59).

7.- His attentis, statuitur ut, novus Ordo lectionum Missae a die 30 novembris 1939, iuxta ea quae Conferentiae Episcopales statuerint vigere incipiat. Iisdem proinde Conferentiis Episcopalibus, postquam editiones populares eiusdem Ordinis paraverint et ab hac Congregatione confirmationem forte necessariam acceperint, facultas fit opportuniorem diem definiendi, quo, a die 30 novembris 1939, novus Ordo lectionum Missae adhiberi debeat aut possit.

E Civitate Vaticana, die 25 iulii 1939.

A. BUGNINI, a Secretis.

BENNO Card. GUT, Praefectus.